

四庫全書

史部

欽定四庫全書

弇山堂別集卷十一

明 王世貞 撰

異典述六

宣德後許親王入朝

自宣德初止漢趙二邸入臨大行以後親王無入朝者
惟襄憲王為英宗叔父邁于王金符之嬖賴上仁明不
為動而王於景泰中疏奏皇太后問上起居及勸景帝

朝上於南城俱留中上見之大感悅特許入朝陛見後
躬至內殿行家人禮宴賚加渥親送至大明門而別再
朝復如之為峴山漢水賦寓思特置一護衛衛王護衛
時不置久矣又詔王春秋高歲時得游觀田獵不為例
今所存御書婉敬剴篤雖漢肅之於東平不能擬其萬
一也姪御名奉書叔父襄王承諭具悉尊意所以惡景
諱之僭分而喜姪之復位及曩有陳言慰安章初未嘗
達皇太后所益為景諱之所蔽匿也今已於景諱宮檢

而得之姪親覽之再三深見叔父忠愛之誠發於謹論
抑邪扶正防微杜漸無非為宗廟社稷計惟叔父之心
即周公之心也叔父二章亦即金縢之書之比也皇太
后聞之感歎不已承畀彩雲捧日玉帶謹以領訖叔父
云欲親行朝見本不敢煩遠來第念先帝同氣至親惟
叔父宗室至賢亦惟叔父于情于誼不可不重得一見
以篤親親今遣太監夏時齋奉勅符及書迎請即時氣
候清和叔父宜從容就道宮眷世子郡王宜留藩邸其

當從行之人亦隨尊意帶來貯俟其至惟叔父亮之

皇貴妃冊寶

故事皇后金冊金寶皇貴妃而下有冊而無寶獨宣德元年以貴妃孫氏有容德請於皇太后製金寶賜之且命太師英國公張輔為正使少師吏部尚書蹇義為副使二公元臣也蓋未幾而貴妃有子冊東駕軒龍亦易位矣自是貴妃授寶遂為故事

東宮送公主入邸

寶慶公主者高帝幼女也文皇既定京師俾仁孝皇后女之十九歸駙馬都尉趙輝資班比諸公主特厚時仁廟在東宮特令送之至邸亦殊典也輝父趙和以千戶征安南戰歿輝襲職守金川門上見其貌偉麗而悅之遂令尚公主時永樂之十一年也輝歷掌南京兩都督宗人府主孝陵祀至成化十二年乃卒為駙馬者六十五年母孫氏守節被旌壽亦至八十餘夫婦以忠節顯而輝極富貴壽康之隆可謂希世之邁矣

賜印記

高皇帝賜懿文太子白玉印方一寸二分曰大本堂記賜中宮皇后白玉印方亦如之曰厚載之記文皇帝賜仁廟玉押曰人主中正仁廟即位時宣廟方為皇太孫復舉以授之命印識章奏國朝惟仁宣二廟優禮大臣賜銀圖書以示褒美後亦有嗣行之者按仁宗朝蹇義夏原吉楊士奇黃淮楊榮金幼孜俱被賜其文曰繩愆糾繆而義又有蹇忠貞士奇楊貞一之印宣宗賜義曰忠

厚寬弘原吉曰含弘貞靜士奇曰清方貞一榮曰方直
剛正胡濙曰清和恭靖又文恭世家吳中曰和敏詳達
景泰賜少傅胡濙曰忠貞惟篤少保王文曰忠誠匪懈
衍聖公孔弘緒曰謹禮崇德按是時王少傅直陳循高
穀于謙三少保當亦有之特以景廟賜不敢登之志傳
耳世宗朝與賜者楊一清張孚敬桂萼李時費宏夏言
顧鼎臣翟鑾方獻夫嚴嵩郭勛仇鸞楊曰者德忠正又
繩愆糾違張曰忠良貞一又繩愆弼違又別記永嘉張

茂恭桂曰忠誠靜慎又繩愆匡違李曰忠敏安慎方曰忠誠直諒費曰舊輔元臣夏曰學博才優顧曰經緯首選翟曰清謹學士又繩愆輔德嚴曰忠勤敏達勛未考仇曰翔卿又曰朕所重惟卿一人今上以少師張居正乞歸葬範銀為圖書以賜之俾得馳傳密封言事其文曰帝賚忠良

憲廟特賜方士李孜省銀圖書二曰妙悟通玄曰忠貞和直得密封言事又鄧常恩圖書一曰橐籥陰陽

蕭崇一圖書二曰至真玄妙曰丹霞歲月世廟賜真人邵元節白玉印文曰闡教護國烏玉印文曰太和子真人陶仲文白玉印文曰凌虛子烏玉印文曰林隱銀記曰秉一保國宣廟賜太監金英范弘各銀記其文不傳又賜王瑾御用銀記四曰忠肝義膽曰金貂貴客曰忠誠自勵曰心跡雙清憲廟賜覃司禮昌牙記二曰忠誠不急曰謙亨忠敬銀記一曰才華明敏石記一曰補袞宣化世廟賜張司禮佐銀記四曰

集謀輔德曰端忠誠慎曰輔忠曰勵忠
麥司禮福銀記一曰恭勤端慎其他未能悉數
蓋中貴人得之不易若大臣則為異典耳

特賜黃金牙刻關防

國朝文武臣領勅行事者俱給關防以銅為之其模制
大小雖相臣行邊與部屬無異獨正德間太監張永征
安化王及再督三關用金鑄見楊文襄一清所撰墓志
文襄與永同事所紀當不謬嘉靖間大學士顧公鼎臣

居守用牙刻闕防賜之皆特恩也

文臣賜第

文臣賜第京師若高帝時有之以後蹇忠定夏忠靖楊文貞楊文敏胡忠安吳榮襄至翰林臣曾榮王英在宣廟俱有賜文貞力辭而止于肅愍陳芳洲高文義王毅愍商文毅在景廟亦有之袁彬所請則文毅賜第也天順李文達王忠肅馬恭襄俱有賜第又為忠肅造第原籍鹽城嘉靖間張文忠治第京師上聞以銀幣羊酒賜

之今人不考遂以為賜第非也其原藉始以書院請特命有司給夫價資營造後夏文愍亦繼之然不名言賜也萬歷元年今江陵築第故里上特輟御前白金千兩遣官齎送

嘉靖中既為真人尚書邵元節陶仲文治顯靈宮於內開法局而宫外復起大第其盛尚書端明顧尚書可學俱有賜第乃至通妙梁散人方士段孺子亦有之不足為異也

特賜額號

高帝以魏國公達勲業非常於居第左右特各建一坊
榜曰大功又特署八字於德慶侯廖永忠門曰功超羣
將智邁雄師以旌異之後襄陽任亨泰為禮部尚書得
幸勅於原籍立狀元坊不為例又親書孝義門三字署
於浦江鄭氏之門皆非有司所請也

世宗時因張文忠請立書院仍親定名曰貞義堂曰抱
忠樓曰寶綸及京師居第成賜以獻皇帝御書榮恩堂

字識其端曰皇考手澤又賜銀印篆刻所賜字敬字及白金四鎰彩帛四束羊酒餽饌等物諭曰前聞卿自為堂曰榮恩所謂榮得君恩也朕思皇考嘗手書三字朕恭裝軸茲併銀印一枚及綵帛等物以為吾君臣相慶之意庶見朕意云耳後楊文襄樓曰寶翰夏文愍書院曰忠禮堂曰瓊恩樓曰寶澤李文庸樓曰珍謨汪榮和樓曰昭恩甘少保樓曰尊恩嚴分宜高靳亦各沾賜分宜堂額曰忠弼樓曰瓊翰流輝供玄像閣曰勅賜延

恩之閣京師堂曰忠正南昌樓曰寶翰堂曰耆德新鄭樓曰寶謨堂曰鑒忠陶東一原籍書樓曰聖翰瓊光今上為張江陵賜堂額曰純忠其左扁曰社稷之臣右扁曰股肱之佐堂對曰志秉純忠正氣垂之萬世功昭捧日休光播於百年樓額曰捧日皆御筆

賜號旌獎

金鄉忠壯侯王真以死難洪熙初進封寧國公加賜號曰効忠少師蹇義少傅楊士奇以輔導功洪熙初賜蹇

號曰蹇忠貞楊曰楊貞一都督僉事楊俊以擒喜寧功
景泰中進左都督特賜號曰忠能又真人劉淵然洪武
初至京特賜號曰高道

賜宴華蓋殿

文皇帝時友愛諸弟每來朝賜宴於華蓋殿辭亦如之
世子郡王則皇太子宴於文華殿獨宴尚師阿里瑪亦
華蓋殿蓋以親王例賓之也十九年特宴兵部尚書趙
壯於華蓋殿以尚書夏原吉九年滿上親宴之武英殿

一時咸以為榮

輔臣三載考績宴禮部

永樂間尚書滿九載如趙壯夏原吉蹇義方賓左副都御史李慶賜宴華蓋等殿後內閣一品九載亦有宴獨萬歷十三年少傅申公滿三載特賜宴禮部九卿三品皆陪列蓋前無之典也又三年以少師滿復如之上疏辭賜折宴白金五十兩文綺四端

賜禁苑乘輿

宣宗時張太師輔蹇少師義楊少傅士奇夏少保原吉
楊宮傳榮金宮保幼孜於西苑讌游俱騎而從時致仕
少保黃淮以謝恩至京亦得從因病瘵特給肩輿嘉靖
中勲輔郭太師勲夏少師言等前後以入直西城賜乘
馬夏公及翟少傅鑾乃私以小輿使人腰之而行上聞
不善也最後分宜以老特許乘腰輿年八十加恩賜肩
輿俱禁中古今所未有之典

賜禁苑直舍

上在西城因賜諸入直大臣廬於無逸殿之左右廂然頗隘而受日至丁巳特建一舍於殿東官道之左以居分宜廳事皆南向別館庖湑皆具又出百金以制一切器用分宜遂以居華亭公亦我朝希曠之典

車駕東宮迎送功臣

洪武三年征北太將軍信國公徐達左副將軍李文忠等討北師還上自出勞於江上二年征南將軍廖永忠副將軍朱亮祖等師自廣西還上遣皇太子率百官迎

勞於龍濟既陞見皇太子送還第十五
年命征南將軍
潁川侯傅友德副將軍永昌侯藍玉西平侯沐英等討
雲南永樂五年征夷將軍成國公朱能副將軍新城侯
張輔等討安南俱上親餞之龍江正德中太監張永討
寧夏叛王往迴上迎送於東安門外

天子臨弔

高帝聞中山王訃至被髮徒步往哭又親至龍江迎祭
常開平鄧寧河國初優禮大臣固已如此後唯武宗臨

祭張英公懋每一奠酒其家進五百金凡九奠南巡幸
靳文僖第令番僧遶座懺悔

行幸大臣

高帝於魏曹二公及大勛臣第往往臨幸以為常宣宗
皇帝嘗夜幸楊文貞第又幸英國公輔第留飲賜金帛
又與中宮幸會昌伯孫忠第宴賚尤厚武宗南巡幸致
仕楊相一清家飲宴三日賦詩酬和楊大出珍寶為壽
至淮安幸總兵官鎮遠侯顧仕隆第

皇太后賜見

宣德六年上奉皇太后謁二陵召少師蹇義少傅楊士奇太子少傅楊榮太子少保金幼孜太常卿楊溥於幄殿面加慰諭賜白金綵幣酒饌萬厯六年江陵還自葬父入謁仁聖慈聖俱加慰諭宴賚尤厚

御製神道碑

國初文武大臣薨逝例請於上命翰林儒臣製文立碑以後漸不請惟中山王姚恭靖乃二聖御筆弘治中昌

國公先塋亦然若永嘉侯壙志之類則上偶為之非以
為榮重也

御製紀功文

高帝時滅元滅陳滅張最為宏鉅之績而未有如椽之
筆以紀之至平夏明氏獨以劉文成上頌不自居而歸
功於臣下然亦傳潁川廖德慶之殊遇也謹錄如左
洪武四年九月三十日朕親紀征蜀二道總兵官功之
低昂以旌忠勇有智之將又戒無謀鈍兵之徒爾基再

作平蜀頌一章為傳將軍廖將軍千萬年不朽之功朕
聞雲從龍風從虎聖人作而萬物覩此蓋上古聖君臨
御恩及海內故賢者讚揚若非聖君安敢受此美稱善
揚者也朕本淮民因元失政豪傑忿爭吾承人後偶獲
多兵訓練為我調用有時命將四出有時親征一方十
五六年間羣雄斂跡惟西蜀一隅限山阻險是有戴壽
者假明之童孩負固不伏陰生詭計說誘諸洞蠻夷為
我邊民患於是發兵二道命將分討三年冬平章楊璟

德慶侯廖永忠率舟師抵瞿塘戴壽以全蜀軍民與之
決戰平章楊璟兵敗收兵僅能與之對壘當年冬潁川
侯傅友德將兵由西番道經階文逾月而抵綿漢蜀兵
莫敢當鋒其戴壽者恃瞿塘之險選老弱守之西行與
潁川侯一戰戴壽披靡再戰困逼成都其攻瞿關舟師
總兵者尚未盡知將軍潁川侯木牌書其戰勝次第順
川江而放流德慶侯獲之連壘而進擣礮破關而至偽
京師幼主明昇銜璧請降戴壽為傅將軍生擒於成都

于是中國清寧論將之功傳一廖二低昂定焉

天佑我邦 師出以律 將忿則揚 馬嘶蹄踏

畫角聲張 惟我潁侯 智勇難量 羌人稽首

壺漿道傍 勞我軍士 綿漢是行 蠹爾戴壽

率衆來當 一戰披靡 拒城且藏 旬日困逼

詣軍請降 傳將功就 再歌瞿塘 天生廖將

與傳成雙 江風浩浩 起我旌幢 泊舟連捷

直破瞿關 生俘為主 市肆無干 遣使飛捷

一刻數關 天產名將 兵出農間 非朕有能
實由天監 有臣在南 居括蒼山 生而能文
舉筆何難 謂我採擇 黼之班班

誦此則主帥湯中山愧汗無地而楊平章者不知死
所矣然後六年中山進封公而潁川以平雲南始亦
進封然傳竟不得與中山同贈王而德慶亦不獲與
平章同贈公事固不可量也

賜調甘露漿

洪武六年正月丙午上御武樓召御史中丞陳寧太子贊善大夫宋濂賜坐談嘉祥之應勅中使入取所儲甘露於宮中盛以翠罌玉潔珠圓世所未覩已而舁罌器至用金杓煉水二升火勢既勻水湧成波上起自龍帳中親啟罌以投須臾融化與水為一上取罌傾瀉二内侍舉幕承之渣滓已盡重漉以絳紗囊上飲一爵而分賜寧與濂曰此天地至和所凝也卿等服之去沉疴延遐齡矣寧等飲畢奠爵于几頓首而退賦詩以記其榮

又一日與濂飲濂素不勝杯杓舉觴即辭上強之至三觴面如赭行不成步上歡笑親御翰墨賦楚詞一章以賜仍命羣臣賦醉學士歌且曰令後世知吾君臣同樂如此也復以濂乏騎乘勅皇太子選良馬以賜上親作馬歌命近臣咸和之俾濂藏之為家寶

君臣同遊

嘉靖十年上召大學士張孚敬尚書李時於西苑視蠶壇地賜酒飯珍餌御製西苑視穀祇先蠶壇位賦手授

孚敬曰朕適有作卿等刪潤因命和以寓警戒之意孚敬請上手書各賜以為子孫世寶許之明日二臣進和賦上亦各賜手書御製賦如所請後數日併裝成帙名曰詠和錄賜之已復諭璉曰朕惟君臣之際固不可不嚴此在朝廷當慎他處則猶家禮然且漢文之名見賈生同語久而文帝為之前席今亦稱美故君臣不交治功安成况朕在冲昧世事未經無一識見卿之於朕無異周公愛成王首以孝訓于朕他持餘事耳卿夙夜在

公敬君盡禮昨見退遜太過恐非輔臣之于君者夫何
謂輔導大臣與他諸臣不同故曰導之教訓傳以德義
保其身體此則不可在朝之制相與明矣今後凡會
議或卿有所奏可無拘時而來面相計處俾交脩朕之
性志有定方可廣接他人庶有所酌別賢否耳朕又欲
於今春奉兩宮春游後與卿輩一遊以仰遵我聖祖丕
訓亦以見幼孫之率由祖道當有宴樂預與卿言之十
五年端陽節賜文武百官宴於奉天殿宴畢上幸西苑

預命侯郭勛大學士李時尚書夏言候於崇智殿遣中
官齎賜艾虎花絛百索牙扇等物上至勛等致辭謝上
曰今日之宴一以賞節一以酬前月山中扈從之勞勛
等頓首謝至水次上御龍舟召勛等各乘舟給酒饌命
檝夫漿三臣舟近龍舟而行自蕉園迤邐至澄碧亭登
岸復宴無逸殿勛等各稱觴上壽盡歡而罷

宴坐超本列

永樂中北征還大宴羣臣第功時大學士楊榮金幼孜

以五品特勅與兵部尚書方賓同列而坐嘉靖中恩榮宴於禮部讀卷官少詹事兼學士李本秩第四品以內閣故特奉旨班尚書末久之復舉恩榮宴巡綽官太保左都督陸炳亦奉旨班尚書末蓋少詹都督故事當東西嚮坐耳萬厯初內閣吏侍申時行亦班坐尚書末用本例也

賜大臣父母

文皇既宴尚書趙莊於華蓋殿輟御前酒饌悉以賜其

母又以元宵節宴羣臣知尚書夏原吉母觀燈賜酒食
鈔二百錠今上嘗以大紅蟒紗衣一襲銀錢二十兩賜
張江陵父以聖母命玉花墜七件彩衣紗六疋賜其母
尋父封少師文明卒後奉母入京上及三宮俱有賜上
賜金嵌寶首飾一副銀八寶一百兩青紅蟒衣四疋裏
絹四疋甜食盒二副仁聖太后金首飾一副紵絲六表
裏食盒八副慈聖太后金嵌寶石首飾一副珍珠環一
雙青紅蟒衣二套銀八寶五十兩食盒八副

二品賜玉帶

玉帶為一品常繫服色大臣品未及而特賜者許繫今
人不知往往以為玉帶非賜不得繫誤也其未至一品
而賜玉者洪武中弘文館學士羅復仁天順中尚書王
翱馬昂大學士李賢成化中尚書白圭弘治中大學士
李東陽謝遷翱賢東陽遷旋加至一品正德則大學士
王鏊費宏楊一清靳貴尚書曾鑑許進顧佐劉璣孫交
石玠楊潭李傑張綵劉機曹元王敞白鉞李遜學王鑑

之毛澄右都御史王鼎內鑿宏一清貴旋加至一品嘉靖中非一品而賜者大學士袁宗臯尚書邵元節陶仲文郭文英也元節以下皆異流圭鉞父子俱官太子少保而沾此賜尤奇

賜坐

洪武中大臣如魏國公達等不時賜宴預坐及學士承旨宋濂等隅坐講論至仁宗亦然正統以後廢矣雖孝宗之敬禮閣臣世宗之寵眷張夏叩頭長跪不聞坐論

也嘉靖末分宜賜坐一次惟真人陶仲文名對坐無算
乃至陶南西嚮上北東嚮以陶坐繡墩上亦坐墩不設
御坐入則迎於廷出則送至門握手乃別

手札不名

高帝嘗與劉誠意宋承旨書御諱頓首復伯溫老先生
及景濂先生是時為國公也

世宗手札貴溪為公謹分宜為惟中然不過三四而已
余見永嘉奉御札百餘道內二十餘道稱元輔張羅峯

或大學士張羅峯或張少師羅峯又面呼羅山遂有御
札稱少師張羅山最後一札稱茂恭當時楊石淙桂安
豐應亦有之而余未之見今上御書與江陵自萬厯元
年十一月以後皆不名內聖諭先生啟沃朕心平治天
下功已在社稷茲當六年考滿特於例外加賜銀一百
兩蟒衣斗牛各一襲少示優眷不必辭又諭朕聞先生
父母俱存年各古稀康健榮享朕心嘉悅特賜大紅蟒
衣一襲銀錢二十兩又玉花墜七件綵衣紗六疋乃奉

聖母恩賜咸欽承旨家僮往齋之外銀錢二十兩是先
生的又手諭白燕蓮花俱進獻聖母甚是嘉悅却獨產
翰林院中先開於密勿之地上天正假此以見先生為
社稷祥瑞花中君子朕賴先生啟沃固不敢顛縱何德
之有又御筆勅諭元輔張少師朕以幼冲嗣位賴先生
匡弼啟沃四方治安九邊寧靜我祖宗列聖亦鑒知先
生之功就加顯爵不為過乃屢辭恩命惟一誠輔國自
古忠臣如先生者罕朕今知先生實心不復強特賜坐

蟒衣一襲銀錢五十兩以示優眷用成先生美德其欽承之故諭以後辭禮益鄭重不可枚舉江陵歿凡有諭蒲坂吳縣亦多不名

詔勅不名

吳元年上諭諸將謂張氏既滅惟大將軍於貨寶無所取婦女無所近其深謀遠畧蓋謂中原未平民未休息豈可遽恃為安乎爾等當如大將軍所存共圖大勛康濟宇內洪武三年議賞將士詔稱大將軍等運謀竭忠

六師用命遂致強殞弱伏疆宇奠安諸番入貢華夷一
統四年命左右丞相詔稱大將軍左右解甲於武備之
庫息馬家庭從善樂游功名兩全古何過哉皆謂中山
王也十八年王沒詔一勅三俱稱中山武寧王開平忠
武王而皆不名至永樂戒諭勛戚大臣皆稱我中山武
寧王而不及開平矣蓋中山以先朝元勛且有椒房之
重故也

萬厯初江陵尤被隆禮凡內閣勅諭部疏御批俱稱元

輔或張先生而不名其聞喪以後尤委曲敦至勅諭中外凡大事待張先生還朝而行又以遼左報捷諭內閣歸功元輔平日加意運籌候疏上卿等一錄封此諭著兵部差人星夜馬上前去與張先生看隱然文終宣成之不名矣

行人齋旨取尚書

自弘治以後內閣輔臣體重故取復位者必遣行人以示優異若尚書雖吏部亦不復爾惟嘉靖初取總制三

邊尚書王瓊回京別用自原籍取吏部尚書方獻夫別用俱遣行人瓊入京補吏部獻夫入京進內閣而其時自原籍召大學士桂萼却不遣行人同官張璁為之請亦不許隆慶中自原籍召大學士高拱亦不遣行人不知爾時事體云何聞高頗以是不樂其同事諸公

宴賞下僚

洪武中特宴勞吳山縣主簿隨贇於別殿賜白金五百兩文綺及帛各百疋陞知縣以奮義平賊也贇後至按

察使有聲

大臣面呼先生

英宗自李文達獨見則稱先生其稱王忠肅多曰老王
孝宗自丁巳後召見劉文靖等必稱先生馬端肅劉忠
宣則稱老尚書見天順日錄燕對錄可證萬厯初元上
敬禮江陵稱先生雖宮中亦稱張先生嘉靖末命宮中
不得名華亭公稱徐閣老皆異數也

大臣賜衛士

天順陳汝言弘治馬端肅文升俱以兵部尚書為怨家
所中詔特給衛騎護之陳五十人馬十二人嘉靖給兵
百人為大學士楊文忠廷和夏文愍言直宿出入衛從

賜禁衣

嘉靖庚申上勅南京織閃黃補麒麟仙鶴紗衣各一副
賜分宜閃黃色惟上得用之甲子賜華亭教子升天蟒
衣一件上手擇有珠者萬厯甲戌上以江陵辭功賞特
賜坐蟒已後賜皆如之而最後武靖侯李偉以太后父

沾焉坐蟒者惟司禮大璫掌印久為上所重者得此賜然累代不數人即勛舊所不與也

賜衣文武互異

嘉靖中內閣嚴徐李皆賜服麒麟麒麟公侯服也而成國公朱希忠京山侯崔元左都督陸炳等以玄壇供事特賜服仙鶴仙鶴文臣一品服也成化以後文臣賜麟不為異而公侯伯武臣賜鶴則異矣六公出入朝行殆不可復辨

五品鶴袍

嘉靖中學士嚴訥李春芳董份以五品撰玄詞特賜仙鶴袍既而上悔之下諭謂玄壇供事可用鶴餘則不可意蓋為三臣也而尚書皆自疑不敢衣鶴亟市錦雞為飾而三學士之衣鶴自若也

賜土官服色


正德中賜播州宣慰司楊斌麒麟衣一襲陞四川按察使後以宣慰致仕復賜麒麟衣一襲最後賜蟒衣玉帶

以貢物厚故也賜永順宣慰使致仕彭世麒大紅蟒衣
三襲陞都指揮使其子宣慰明輔大紅飛魚服三襲給
正三品散官誥命以進大木故也嘉靖末復以進大
木賜致仕宣慰彭明輔蟒衣進湖廣都指揮使致仕
子宣慰翼南飛魚衣一襲進雲南右布政使正德賜
日本使臣宋素卿大紅飛魚服一襲中人瑾受其黃
金故也素卿閩人至嘉靖中始以爭貢事論死

賜尚師儀仗

今公侯前導止藤杖一對鞍籠馬杌一對而已攷之國
初有公侯儀仗戶當不止此永樂中賜尚師法王阿里
瑪牙杖二金瓜二骨朵二幡幢二十四對銀香爐盒二拂
子二銀手爐三對紅紗燈籠一對鮫燈二對傘二銀
交椅一銀脚踏一銀水罐銀盆一誕馬四鞍籠二銀杌
一青圓扇一紅圓扇一帳房一紅紵絲拜褥一玉印誥
命織金珠袈裟金銀器皿成化中法王扎巴結叅賜儀
仗亦如之特許用樓轎前後皆以錦衣校卒供應見者

皆以為親王



弇山堂別集卷十一

欽定四庫全書

史部

弇山堂別集卷十四

二至

詳校官編修_臣李潢

編修_臣裴謙覆勘

總校官中書_臣朱鈐

校對官中書_臣李棨

謄錄監生_臣沈安邦

欽定四庫全書

余山堂別集卷十二

明 王世貞 撰

異典述七

勛臣超贈

勛臣贈爵超踰本階者實出一時特恩皆記之

侯超贈王者西平侯沐英為黔寧王

一品超贈國公者中書平章政事俞通海為虢國公都

督同知康茂才為蘄國公

二品以下超贈國公者親軍都指揮使馮國用為郢國公江浙行省叅政胡大海為越國公樞密僉院趙德勝為梁國公張德勝為蔡國公指揮使丁德興為濟國公三品以下封郡公者樞密院判耿再成為高陽公元帥俞廷玉為河間公武德衛指揮副使茅成為東海公海寧衛指揮副使嚴德為天水公樞密僉院丁普郎為濟陽公封郡侯者樞密院判花雲為東丘侯都指揮使韓

成為高陽侯樞密院判李繼先為隴西侯左副指揮劉
齊為彭城侯統軍元帥許圭為高陽侯左副元帥趙國
昭為天水侯左副元帥呂文貴為汝南侯左副元帥余
杲為下邳侯統軍元帥宋貴為京兆侯右副元帥王勝
為太原侯太平興國翼元帥陳兆先為潁上侯秦淮翼
右副元帥李信為隴西侯行樞密院判官張志雄為清
河侯水軍元帥同知李志高為隴西侯金斗翼右副元
帥徐公輔為東海侯水軍右副元帥劉義為彭城侯金

斗翼右副元帥陳弼為潁川侯

又鄉人布衣劉繼祖為義惠侯

右其時稱郡公郡侯者尚因元制不為極品第視本秩則超等矣文臣封爵已見前故不復贅

又都督副使孫興祖為燕山侯靖江王相蔡僑為安遠侯指揮桑世傑為永義侯燕府左傅丘廣為昌樂侯都督僉事王簡為霍山侯高顯為汝陰侯何德為廬江侯孫世為富春侯陳清為合浦侯陳文為東海侯于顯為

英山侯廣西都指揮使王真為臨沂侯指揮副使孫虎
為廣安伯虎賁衛指揮潘毅為滎陽伯行省叅政戴德
為譙郡伯

按自二年以後侯爵重矣伯亦次之故兼紀焉然自
都督以至同知俱無贈而贈者獨都督僉事又不可
曉也

永樂初以靖難陣亡贈都指揮同知張玉為榮國公都
督僉事陳亨為涇國公指揮同知譚淵為崇安侯右護

衛百戶王真為金鄉侯下安南陣亡贈都督僉事高士文為建平伯世襲又都督僉事張欽為新泰伯孫榮為萊陽伯程寬為保昌伯金玉為惠安伯

公孤超贈

故事文臣少師少傅少保贈太師太傅太保東宮三太贈三少東宮三少贈東宮三太然亦有不及等者有超等者今記其超等者於左

少保夏原吉少保楊溥少保李賢少保彭時太子太保

儀銘太子太保王恕弘文館學士劉基俱贈太師劉雖
封伯尚二品也太子太保靳貴吏部左侍郎曹鼐俱太
傅尚書胡濙王直高穀尹旻俱太保尚書金忠學士胡
廣俱少師尚書苗衷侍郎馬京俱少傅太子少保尹直
尚書陳洽鄺埜王佐侍郎墨麟俱少保侍郎王一寧太
子太師侍郎王鍾儀智俱太子太保少詹事鄒濟左贊
善徐善述興府長史張景明俱太子少保右贊善王汝
玉太子賓客

燕府長史朱復北京行部尚書行太僕少卿孫瑜戶部尚書北平布政司叅議成璉吏部左侍郎

按儀忠襄王端毅遂超八等而為三公首曹文襄以三品遂得三公尤為異也胡王高尹雖嘗為師傅等官後皆辭削其歿也實以尚書請

累贈官

洪武贈平章廖永安楚國公再贈鄖國公俞通海豫國公再贈號國公

避二王封也

贈僉都督濮英金山侯再贈樂

浪郡公贈舍人張子明為千戶再贈忠節侯贈樞密院
判耿再成高陽郡公再贈泗國公贈指揮使丁德興都
指揮使再贈濟國公永樂贈都指揮張玉榮國公洪熙
再贈河間王贈左都督徐增壽武陽侯再贈定國公贈
百戶王真金鄉侯洪熙再贈寧國公贈太子少師姚廣
孝榮國公洪熙再贈少師贈文淵閣大學士胡廣為禮
部尚書洪熙再贈少師贈北平布政司叅議成璉吏部
左侍郎洪熙再贈兵部尚書洪熙贈少詹事鄒濟太子

少保成化再贈太子太保景泰贈會昌伯孫忠為侯天
順再贈太傅安國公成化三贈太師景泰贈吏部左侍
郎兼翰林院學士曹鼐為少傅吏部尚書文淵閣大學
士天順再贈太傅正德贈右都御史史琳太子少保再
贈太子太保贈少師太子太師吏部尚書馬文升特進
榮祿大夫太傅嘉靖再贈左柱國太師贈江西按察司
副使許達左副都御史再贈禮部尚書萬厯少師太子
太師吏部尚書楊博贈太傅少師大學士張四維俱再

贈特進

致仕給祿

致仕官給全俸洪武中兵部尚書單安仁唐鐸嘉靖中
少保禮部尚書席書給半俸者永樂初吏部尚書張統
戶部尚書王鈍宣德中戶部尚書郭資太僕寺卿趙昱

辭官加秩

弘治中成國公朱儀辭南京守備魏國公徐浦辭掌南
京中軍都督府請專奉孝陵祀不允辭加太子太傅嘉

靖初魏國公徐鵬舉復辭南京守備及府任請專奉孝陵祀不允辭加太子太保

致仕加級

成化中致仕太子少保大學士商輅進少保南京吏部尚書陳俊戶部尚書翁世資加太子少保弘治中上隆禮大臣尚書致仕有兼官者多加從一品宮臣無兼官者多加從一品散官如白宮保昂徐宮保貫加太子太傅徐尚書瓊周尚書經王尚書軾俱加太子太保益援

商公例也正德初閔莊懿珪以宮保加少保劉忠宣大
夏張尚書昇屠尚書勲閻尚書仲宇何尚書鑑田尚書
景賢俱加太子太保嘉靖初彭宮保澤加少保孫尚書
交林尚書俊陶尚書琰俱加太子太保吾太倉毛尚書
澄加太子太傅已後恩典絕少惟嘉靖五年少保禮部
尚書席公書以目疾乞致仕特加武英殿大學士給全
俸賜第京師仍許不時言事大學士從來不為加官而
全俸亦百五十年所闕之典也蓋以議禮加厚耳然命

下三日而卒竟不得沾恩隆慶四年大學士陳公以勤致仕加太子太師吏部尚書蔭錫郵護最隆萬厯二年工部尚書朱公衡三年左都御史葛公守禮乞休俱以九六年滿朱加太子太保葛太子少保十五年南京吏部尚書袁洪愈加太子少保南京大臣加秩自袁始也勛臣如太子太保鎮遠侯顧寰辭府事特加少保尤為殊典後南禮部姜寶兵部傅希贊俱加太子少保

致仕後加官

景泰中致仕右長史楊翥以潛邸恩進禮部左侍郎來朝再進尚書正德中致仕國子祭酒章懋遷南太常卿南禮部侍郎不赴嘉靖初以舊德褒進尚書致仕南京給事中史後以曾言事進光祿少卿以助賑荒再加四品服色嘉靖初致仕戶部尚書韓文以守正褒進柱國太子太保柱國三年滿始得之於致仕後加尤為希曠之典提學副使潘府初加太僕少卿再以薦改太常少卿俱致仕後萬厯中養病吏部尚書嚴清禮部尚書陸

樹聲俱加太子少保又嘉靖中間住右通政呂希周以倭功遷通政使間住吏部主事史際以倭功遷尚寶卿再遷太僕少卿間住應天府丞朱隆禧以進藥餌遷太常卿禮部左侍郎隆慶初閑住右諭德唐汝楫以宮臣加太常少卿俱仍致仕於乎均一異恩也

際即後之子

致仕任事

洪武末兵部尚書唐鐸以致仕尚書起叅贊征南夷軍務竣事歸里鐸凡三為兵部一兼詹事一兼賓客一兼

太子少保卒後上親為祭文賜葬恩禮之渥一時莫比

今職古銜

世廟好用古官名又最重典禮故於貴溪分宜鉛山華亭泰和常熟興化諸公往往傳旨稱大宗伯太宰又于少保胡公宗憲總督江西福建軍務旨云大司馬兼院右正題少師大學士費公宏詠春同德錄曰內閣掌叅機政輔導首臣費宏尤為新竒

用給事御史

高帝時給事中品秩不甚崇而所選皆正途至永樂中
不無猥雜其他以國子生廕恩得者所不道姑記之則
貴州清遠衛軍羅義上建文君請與燕講和下獄文皇
下京師即日破械出之拜戶科給事中明年遷左叅議
復以長史司吏楊勉為給事中後遷都給事中又永樂
中淮安山陽縣民訟師丁珏誣告里中富人妖言惑衆
坐死者十餘人法司薦其忠直特拜刑科給事中

御史除授正統四年以刑部照磨陳嶷司務楊恕李儼

陸獻行人司副劉克產序班王盛正字沈寅孔目劉烈
審理副郭鉦按察司經歷計珩副斷事楊綱鹽井提舉
邵盤縣丞安羽趙瑜試御史五年以序班張鏞孫睿趙
倫斷事張文昌知事康榮照磨張禮判官胡信縣丞鄭
傑教授上官民瞻教諭韓楊鄭顥訓導鄭觀曹泰成規
齊韶王魏陸儔唐震實授御史自後始專以進士行人
中書舍人博士推官知縣國子監官而雜職不與矣然
猶有國子監生天順後始革

郎中坐法改御史

正德四年戶部郎中劉繹以公事罰運遼東米千石又賠補浥爛草束舉家囚繫本身杖比百日不能償上疏哀懇乞充齋膳徒夫或炒鐵煎鹽下都察院查釋前罪降級外任送吏部尚書張綏言其素有才守改降監察御史清理兩浙鹽法因禍得福亦一時極異之典也

立中宮加恩內閣

萬曆六年立中宮王氏加恩輔臣少師張居正以守制

不支祿故辭少保呂調陽進少傅尚書張四維進太子
太保俱蔭一子中書舍人至七年居正服闋進太傅加
歲祿百石蔭一子尚寶司丞辭太傅六年以前中宮立
無加恩故事蓋異典也

皇子生推恩內閣司禮

萬曆十年皇第一子生恭妃王氏出也下詔赦天下尊
上兩宮徽號仁聖懿安皇太后為仁聖懿安康靜皇太
后慈聖昭文皇太后為慈聖昭文明肅皇太后推恩慈

聖父武清伯李偉進封武清侯兄弟都指揮李文全指揮李文貴俱陞左都督千戶李文松陞指揮使俱給應得誥命仁聖父固安伯陳景行歲加祿米一百石蔭二子俱錦衣衛百戶前母莊皇后兄李鶴歲加祿米六十石又內閣輔臣張四維加少師吏部尚書中極殿大學士其太子太師如故申時行加少保戶部尚書武英殿大學士其太子太保如故各蔭一子尚寶司丞余有丁加太子太保文淵閣大學士其尚書如故蔭一子中書

舍人俱各給應得誥命又司禮監馮保蔭弟姪都督僉
事張宏蔭指揮使孫隆張鯨蔭指揮僉事何進李佑張
朝蔭正千戶俱錦衣衛按皇子生例不推恩徽號推恩
止皇親而已此異典也

邊功加恩內閣

正德五年寧夏平加恩內閣少師太子太師吏部尚書
華蓋殿大學士李東陽加特進左柱國仍蔭子尚寶司
丞少保太子太保吏部尚書武英殿大學士楊廷和加少

傳太子太傅仍蔭子中書舍人吏部尚書文淵閣大學士劉忠加少傅太子太傅武英殿大學士還各賞銀一百兩紵絲四表裏太子少保吏部尚書文淵閣大學士梁儲改武英殿大學士邊功未有及內閣者有之自茲歲始八年以山東河南賊平內閣大學士李東陽楊廷和梁儲費宏各蔭子錦衣世襲正千戶辭乃詔東陽兼支尚書俸廷和加少師太子太師華蓋殿大學士儲加少傅太子太傅謹身殿大學士宏加太子太保武英殿

大學士已上二條蓋內臣欲大有封殖而以是餌閣臣也自是閣臣不與軍功者幾三十年至嘉靖十九年陝西大捷詔復夏言特進光祿大夫上柱國少師太子太師仍兼進吏部尚書華蓋殿大學士翟鑾加少保此則夏公以忤旨鐫秩急欲光復故也自是不已而議搜河套希大封拜得罪死三十年獲叛寇哈達拉等輔臣嚴嵩陞子世蕃工部右侍郎仍蔭一子錦衣衛千戶東閣大學士李本進禮部尚書而撰文尚書徐階加少保蔭

一子入監公朱希忠加太子太師都督陸炳加太子太保尚書孫承恩加太子少保此則贊玄例也三十三年以拒寇功輔臣嚴嵩蔭子尚寶司丞徐階李本蔭子中書舍人而伯陶仲文增祿百石公朱希忠都督陸炳增祿五十石伯承裕加太子太保亦贊玄例也自是復不與邊功者將二十年而為隆慶以遼左功輔臣高拱加柱國中極殿大學士張居正加少師兼太子太師俱蔭一子錦衣衛千戶殷士儋加少保與原輔臣趙貞吉俱

蔭子中書舍人萬厯中數以遼東戰功輔臣張居正呂
調陽張四維加蔭賞從厚最後居正遂自太傅進太師
子錦衣衛指揮僉事簡修陞同知世襲仍歲加祿米百石
張四維加兼太子太師蔭子錦衣所鎮撫世襲申時行
加太子太保而極矣十二年雲南大捷大學士時行加
少師太子太師中極殿大學士余有丁加少傅兼太子
太傅建極殿大學士許國加少保兼太子太保武英殿
大學士

更定舊官

國初官制後革者記之以備考而人亦附焉

中書令不設左右丞相正一品平章政事從一品左右丞正二品叅政從二品叅議正四品

上初下建康立中書省上以中書省右丞相總省事李善長宋思顏為叅議李夢祥郭景祥為左右司郎中侯原善楊原杲陶安阮弘道為員外郎孔克仁陳養吾王愷為都事王疇為照磨樂鳳為管勾夏煜韓子魯為博

士善長進叅政徐達為右丞邵榮俞通海為平章政事
上即吳王位善長為右相國改左徐達為左相國改右
常遇春為平章張昶楊憲為叅政上即大位善長為左
丞相達為右丞相遇春為平章軍國重事湯和廖永忠
李伯昇李思齊王溥為平章不治事汪廣洋自叅政為
右丞謫楊憲為右丞遷左丞謫汪廣洋再為右丞相謫
胡惟庸由叅政為左丞進右丞相遷左丞相廣洋復為
右丞相汰平章叅政等官十三年惟庸族廣洋賜死罷

中書省散其職六部尋置四輔官告太廟以耆儒王本杜佑龔黻為春官杜黻趙民望吳源為夏官敕之曰昔耕莘者為宰社稷永安築巖者在朝君仁民康二臣繼出于殷商致君六百年之大業是賢者雖處同出異其忠君濟民之道則一朕今召爾等來朝命為四輔官兼太子賓客位列公侯都督之次必欲德合天人均調四時以臻至治其敬慎之居三日復敕謂人主以一身統御天下不可無輔臣而輔臣必擇乎正士堯舜以得賢

而昌辛受以棄賢而亡卿等受斯重任宜體朕懷心常
格神行常履道佐理贊化以安生民且卿等昨為庶民
今輔朕以掌民命出類拔萃顯揚先親天人交慶於戲
盛哉又十日敕本等曰自胡惟庸不法之後特召天下
賢才而有司又從泛舉尚書范敏獨能薦卿等以輔朕
朕視卿等皆高年篤厚故九月告於太廟議立四輔以
王本杜佑龔穀為春官杜穀趙民望吳源為夏官惟秋
冬官缺以本等攝之邇年自春徂秋天災疊見維秋之

暮天氣尚暄嘗諭本等沐浴致齋精勤國務以均調四時本等奉命且誠逮立冬朔風釀寒以成冬令嗚呼天其兆吉人乎感應之機如響斯答古者三公四輔論道經邦理陰陽順四時其或有乖戾則曰公輔失職蓋人事有不齊則天應之有如此者卿等尚當竭忠誠以勤厥職庶幾感格天心御集中又有與本等同游唱和詩多不載明年命刑官議獄送四輔及諫院給事中覆覈無礙奏行之有疑讞四輔官封駁之尋召左御史中丞

安然為四輔官龔黻致仕復起為國子司業尋以星變
勅諭王本等本尋坐法磔於市又明年罷不復設置大
宗正院改為宗人府置宗人令左右宗人正左右宗人
以秦晉燕周齊五王為之俱正一品後存府以駙馬都
尉領之置皇太子左右率府都督同知康茂才張興祖
兼左右率府使副使顧時孫興祖同知王府事僉事吳
禎耿炳文兼左右副使置諫議大夫以唐鐸為之置諫
院左右司諫以耆儒劉堦關賢為之左右正言以耆儒

趙肅何顯周為之置執法議理司以前元工部尚書濂
為之乃李韓公之女弟壻也置審刑司左右審刑正六
品左右詳議正七品凡大理寺平允法司囚犯皆得詳
駁之置考功承勅司文三監每監設令一人正六品丞
二人從六品監察御史馬亮張迴等五十六人為之命
中書省兵部定給武官誥勅之制其特授陞除者大都
督府同承勅監官以上旨附籍其初入仕者具年籍父
祖已身功蹟其已入仕及陞除者具所歷功過年籍大

都督府咨于中書省送兵部覆奏貼黃考功監叅攷同
奏附籍部擬散官移文翰林院撰文付司文監校勘奏
付中書舍人書寫署名用印轉付承勅考功二監并還
本部以次署名用印齎赴省府臺官署名仍付司文監
對同署名用印方付各部給授如襲職降用者大都督
府勘驗具年籍祖父功蹟降用者具其罪名奏旨處分
承勅監官附籍具咨省送部覆奏貼黃叅攷對同擬官
撰文署名用印給授如前置平馭諸司命翰林院編檢

以下春坊司直以下贊讀考駁諸司奏啟如平允則署其銜曰翰林院兼平駁諸事某官某押置磨勘司令以太子伴讀高暉為之置內正司司正一員正七品司副一員從七品專糾內臣之失儀者尋改曰典禮司又改曰典禮紀察司陞正六品尋止稱紀察司以李彬言等為之置繩頑司令丞各一員置稽疑司正一員正六品左右丞各一員從六品屬官曰司筮無品署東宮通事司令一員從八品丞一員正九品榮鉉鄭肅為之署東

宮文學趙晉為之置城門都尉一員以死事指揮劉廣子景為之君子衛居文官子姓舍人衛居武官子姓以指揮使李謙安子忠領之置侍儀引進使正五品閣門使從五品以故誠意伯劉基子仲璟為之置尚賓大使儒學提舉提舉司校理侍禮郎奉天門待詔俱革

易名而職如故或品有上下者樞密院為大都督府又為中左右前後五軍都督府使知院從一品為左右都督陞正一品副使同知院正二品為都督同知從一品

僉院從二品判官從三品今為僉事正二品上初下太平自稱太平興國翼大元帥下建康立天興建康翼大元帥府廖永安為大元帥常遇春尋為行中書省馬步水軍都督大元帥尋設江南行樞密院湯和同僉院事徐達廖永安為同知院事改院為大都督府朱文正為大都督品如知院李善長兼府司馬宋思顏兼叅軍後以李文忠湯和為左都督馮勝鄧愈為右都督永樂以後五府職名如故而權悉歸兵部矣有副使在僉事之

上尋革復置大都督叅議一員正三品戶部尚書樊思
民為之又置掌判官品同叅議吏部尚書陳銘為之五
斷事司下各設稽仁稽義稽禮稽智稽信今俱革而其
職為經歷都事御史臺左右御史大夫從一品中丞正
二品侍御史從二品治書侍御史正三品殿中侍御史
正五品上為吳王始創臺以湯和鄧愈為左右大夫劉
基章溢為中丞文原吉為治書安然為中丞基實幹臺
事復省治書殿中不置而汪廣洋自左大夫入中書陳

寧代之安然為右大夫中丞涂節告變而臺以中丞為
長官安然任之後改為都察院都御史僅七品御史九
品尋復陞正三品俄以左右都御史代大夫為正二品
副都代中丞為正三品僉都代侍御為正四品與六部
頡頏矣翰林院初設學士正三品講讀學士正四品直
學士正五品待制從五品應奉正七品尋設學士承旨
正三品學士從三品承旨則詹同宋濂為之學士則陶
安朱升為之直學士陳桎范常為之待制秦裕伯王禕

為之應奉趙震殷哲為之後罷承旨直學士待制應奉
不設而降學士為正五品講讀學士為從五品建文初
改講讀學士為文學博士方孝孺任之叅預機務如內
相復置檢閱一員從九品

洪武末設華蓋謹身文華武英諸殿文淵閣東閣大學士
俱正五品華蓋以劉仲質邵質文華以全思誠鮑恂余
銓張長年武英以吳伯宗文淵以朱善宋訥東閣以吳
沈為之而無所領惟從容備顧問而已其後罷不設建

文中革大學士止設學士而以謹身為正心然亦竟無授官永樂始以胡廣楊榮金幼孜為文淵閣大學士領閣務洪熙進楊士奇華蓋楊榮兼謹身黃淮金幼孜兼武英獨以光祿署丞權謹為文華殿大學士無兼官亦不預閣務謹去後文華至今不設大學士得非以皇太子講讀之所故耶此殊不可曉嘉靖末以華蓋殿為中極殿謹身殿為建極殿首以徐階袁煒充建極殿大學士而中極自隆慶初始補李春芳

洪武初設弘文館學士不言品秩劉基危素睢稼胡鉉
王大中羅復仁為之尋革至洪熙元年章皇帝復建弘
文閣于思善門右以儲經史備顧問翰林學士楊溥掌
閣印帝手授之侍讀王璉五經博士陳繼吏科給事中
王榮叅其事不久併閣務入文淵閣溥亦辦文淵閣事
左右春坊大學士與正學士同品洪武中無任之者當
亦以為衍耳建文以任董倫永樂立東宮李至剛為左
解縉胡廣楊士奇因之解縉為右黃淮因之洪熙曾棨

為左王英為右景泰商輅為左彭時呂原倪謙因之劉儼為右劉定之因之逾五十年而弘治癸亥會典成以左坊學兼讀學遷中允楊廷和上疑而問之內閣具實對乃已廷和竟遷不設贊善大夫正五品宋濂嘗為之後止為贊善從六品司直以下亦不常設置將作卿正三品單安仁為之後并入其事工部而名尚存後改為營繕正置司農卿正三品楊思義為之後入戶部置京畿都漕運使正四品專治京師軍儲單安仁薛祥為之

置宣徽院使正三品阮崇禮為之後為光祿司卿徐興
祖為之最後為光祿寺從三品置太史院使正三品劉
基為之改院為監使為令通判僉事各一員後為司天
監定為欽天監正五品有正副等官置回回監正副以
下同欽天監後革置醫藥提舉司改太醫監正三品少
監正四品孫守貞為之後改為太醫院使正五品院判
正六品置滌陽牧監從三品後為太僕寺置儀禮司正
副後為鴻臚寺卿少卿置信寶提舉司從五品後為尚

寶司正五品置營田使專董墾近畿田大都督府副使
康茂才為之至嘉靖中設三都御史清屯尋革置帳前
總制親軍都指揮使馮國用國勝為都指揮使朱文忠
康茂才為左右副都指揮又置金吾侍衛軍都護又置
都鎮撫司孫養浩為鎮撫又置錦衣都尉府正三品蓋
即今錦衣旗手衛也又置兵馬司都指揮使副都指揮
等官後改文職降至六品而猶冒故銜

初置江南行中書省以後平浙江湖廣江西河南山東

等處俱設行省其品秩一如內省惟不設丞相有表國
公歐普祥者因偽漢故官而已後改行省為布政使司
布政使視平章為從二品左右叅政從三品叅議從四
品行樞密院為都司都指揮使正二品同知從二品僉
事正三品初下太平興國翼大元帥李善長為都事潘
庭堅為教授汪廣洋為令史下建康諸路廖永安徐達
常遇春湯和俞通海鄧愈邵榮耿炳文為大元帥後改
翼為衛置指揮使同知僉事等官事實品祿如故置詹

事院詹事則右都督馮勝領同知則平章胡廷瑞廖永忠李伯昇領之副詹事則左右丞趙庸王溥領之後併為少詹事置諸王府左右相各一員正二品左右傳各一員從二品以鄭九成王克復汪河文原吉朱復為相桂彥良熊鼎為傳而別設長史官為正五品若相屬官者尋以耿炳文吳良謝成等為武相傳位居文臣上其後革相傳併入長史見任者皆降秩五品而武相傳事亦入護衛十八年命進士觀政六科承勅考功諸監者

曰庶吉士取庶常吉士之義也以楊靖沈潛等為之二十八年改六科給事中曰元士以見在人數正得八十
一也復改曰源士以政源所自出也

建文官制後革

建文元年更定官制六部尚書陞正一品增左右侍中正二品侍郎如故省戶部十四司為民部度支部金帛部倉庾部刑部十四司為詳憲部比議部職門部都官部諸司俱去清吏二字都察院左右都御史去左右二

字後改御史府都御史為御史大夫通政司為寺使為卿通政叅議為少卿丞增其屬左右補闕拾遺各二員與大理寺卿止稱通政大理卿左右寺正為都評事副為副都評事司務為都典簿太常光祿太僕鴻臚尚寶俱止稱卿其少卿丞分左右祠祭署之稱天壇者曰南郊泗州者曰泗濱宿州者曰新豐增鍾山祠祭署及司圃所光祿少卿陞從四品太僕增少卿丞各一員及典廩典牧二署驍驍十五羣遂生三羣分隸之詹事府詹

事曰詹事卿少詹事曰少卿增賓客二員增設資德院
資德一員資善二員其屬贊讀贊書著作郎各二員掌
籍典簿各一員國子監增司業為二員省博士學正學
錄增助教為十七員翰林院增承旨一員文學博士一
員省講讀學士置文翰文史二館文翰設侍書革中書
舍人職歸之文史館修撰以下如故殿閣學士俱去大
字謹身殿大學士為正心殿學士六科省左右給事中五
城兵馬指揮曰兵馬副兵馬布政使陞為正二品止一

員去左右字提刑按察司曰肅政按察司陞廣東鹽課
司為都轉運鹽使司革五府斷事及稽仁稽義等官親
王府增賓輔二員正三品左右長史上增長史一員正
四品增伴講伴讀伴書各一員審理典膳奉祠良醫典
寶各正去正字郡王賓友二員正四品教授一員記室
二員直史一員左右史各一員吏目一員典印典祠典
禮三署各一員典饌典藥二署各二員引禮舍人二員
儀仗司吏目一員凡賓輔三伴賓友教授進對侍坐稱

名不稱臣至永樂初俱改正從洪武之舊

更定勛階尚書曰特進資政上卿侍中曰資政卿二品
如之侍郎曰資政亞卿三品如之郎中曰資政中大夫
員外郎曰資政大夫給事中曰嘉政中士又遣戶部左
侍郎夏原吉給事中徐思勉等二十四人充采訪使分
巡天下問民疾苦旌廉斥貪得以便宜行事

永樂官制

永樂初以北平為北京置行部尚書二員侍郎四員所

屬吏戶禮兵刑工六曹郎中員外郎主事品秩如京師
而其職則布按二司也末年置六部始革置行後軍都
督府以代都司後置五府其事歸焉

弇山堂別集卷十二

欽定四庫全書

弇山堂別集卷十三

明 王世貞 撰

異典述八

召故相勅劄

我朝超用內閣大臣未有如張永嘉之篤者真所謂家
人父子也按嘉靖十五年致仕少師兼太子太師吏部
尚書華蓋殿大學士張孚敬表啟問安仍疏賀冊嬪上

優詔答之遣錦衣衛副千戶劉昂視享敬于家賜之勅
曰卿以內閣元輔朕所倚毗頃因有疾懇乞歸休朕察
卿有不獲已之情乃特俞允送卿還鄉茲得卿來疏奏
問并賀省覽之餘具悉忠愛特遣錦衣衛副千戶劉昂
齎勅往視卿疾如既愈即便來京勿負朕望果未除則
當善自保攝用副朕眷思之懷復以手勅付昂曰勅舊
輔孚敬卿比以疾乞還允切朕思昨得奏賀朕躬平吉
聖母康泰及擇原選淑女內曰曹王二氏朕御而各有

喜期將近已先冊封為端昭二嬪并河南李氏京選王氏補為敬靜二嬪又朕於春三月躬行謁陵禮奉慈車率后妃禮成後又于四月之吉命工恭飾新七陵增造等項朕自作幽宮于長陵左之陽翠嶺

即十道嶺更名

改小山

一名平臺山以尊皇祖太宗嘗御之地前次并往金山拜皇高祖妣章皇后皇曾叔祖景皇帝二陵奉聖母舟回京今朕命使昂往視卿於家卿如果疾未痊便不煩以見如小可即星夜以行急來見朕副切思情勿自負

自棄以致朕懷無已卿其承之

致仕守正大臣勅諭

世宗初政羣臣論薦大學士劉健謝遷戶部尚書韓文
皆以論劾逆瑾守正被害後雖復官而旌典不及於是
特遣行人齎勅謹錄之以見一時之盛

皇帝勅諭特進光祿大夫左柱國少師兼太子太師吏
部尚書華蓋殿大學士劉健朕惟人臣之事君得志行
道樹功烈於當時者固難而名遂身退康寧壽考始終

一節足以繫天下之望尤為不易卿資稟醇正器識恢宏粵自早年究心理學上探河洛之傳登名賢科蜚聲藝苑勞勤懋著聞望彌隆遂以碩德長才受知於我孝宗皇帝簡自聖心擢居政府朝夕獻替不詭不隨培植人才愛惜善類宣達民隱慎守彝章延訪于便殿賜問於平臺危言讜論裨益弘多是以致弘治十有八年之間政事清明實惟卿與二三大臣佐理之功至於顧命之際推誠付托至切至專卿感激知遇益切勞瘁故當

武宗皇帝改元之初隨事納忠曲為匡救其毅然不可回之氣往往形於辭色釐革宿弊斥逐羣小直道難容告老而歸高風大節播在天下中遭權姦橫加讒抑旋復昭雪人皆欽仰之不置乃今年近九旬體履康泰全名盛福求之當代實鮮其倫惟昔宋之名賢如司馬光文彥博輩皆卿鄉哲揆其始終進退之大義抑亦不多讓焉朕嗣承大統圖新治理顧茲尊賢優老之典誠不可緩惟卿累朝舊德實軫朕懷矧夫公論明揚至再至

三亦可見卿之賢於人遠矣茲特遣行人齎勅至家存問仍賜羊酒命有司月餽官廩八石歲給輿隸十名用表異數卿其體朕至意頤養天和茂膺壽祉用表儀於天下非特卿一鄉一邑之光而已朕又聞老臣體國義不忘君卿有嘉謨至計尚無所隱以輔朕之不逮期於海內乂安共享太平之福而卿亦有令譽於無窮矣欽哉故諭時正德十六年之五月戊午也

皇帝勅諭光祿大夫柱國少傅兼太子太傅禮部尚書

武英殿大學士謝遷朕惟人臣立朝得行其志建功立業者固難而退處其鄉壽考康寧完名全節足以繫天下之望尤為不易卿性資端方器識宏遠粵自早年潛心正學遂以文章大魁天下蜚聲翰苑譽望彌重建孝宗皇帝簡注有素爰自宮端擢居內閣朝夕獻替不激不隨當時政化清美實惟卿二三大臣佐理之功暨聞末命付托諄切益感知遇誓竭誠悃故當武宗皇帝改元之初隨事納忠協心匡弼釐革宿弊斥逐羣小直道

難容告老而歸高風大節播在天下乃今年踰七袞體
履安康子姓蕃茂全德盛名求之前代亦不多見焉朕
嗣承天序圖新治理顧茲尊賢優老之典誠不可緩惟
卿累朝耆舊實軫朕懷茲遣行人齎勅存問仍賜羊酒
命有司月餽官廩八石歲給興隸十名用表異數卿其
體朕至意願養天和茂膺壽祉行將起卿于家得聞猷
告以輔朕之不逮惟國有無窮之休而卿亦有無窮之
問矣故諭

皇帝勅諭光祿大夫柱國太子太保戶部尚書韓文卿以宏遠之才清慎之操敷歷中外多閱歲年晚貳銓衡晉司邦計勞績茂著為時名臣越在先朝首倡論劾除革羣姦遭讒去官退居田里凜然風槩天下想聞乃能懋修靡懈德望愈隆壽考康寧年踰八袞完名盛福求諸今日益僅見焉朕初嗣位念卿一時耆碩人望攸歸已有旨起用茲特先遣行人齎勅存問并賜羊酒仍令有司月給食米四石歲撥人夫六名以示優眷行將起

卿於家來覲闕廷以為班行之光卿其願養天和益邵
乃德康乃身用副朕寤寐老成至意抑書有之曰爾身
在外乃心罔不在王室卿有嘉猷嘉謀未展盡於平素
者尚無所隱以裨朕之不逮卿其敬念之哉故諭時俱
十六年六月之壬子也是時劉公年八十九韓公年八
十二謝亦七十三矣韓以尚書得之尤為異數後四年
韓卒壽八十六五年劉卒壽九十四七年謝復召明年
復歸又二年卒壽八十二自是王公醵楊公一清劉公

忠三少傅皆有司援例為請得慰諭存問而名壽俱不能及也

致仕輔臣壽考恩典

以禮致仕內閣大學士八十尚書九十賜存問起自嘉靖初載實帝王隆禮耆碩至典內閣大學士凡四見而萬歷九年為盛嘉靖元年少師大學士劉公健九十河南左布政使閔楷等以聞詔以健累朝舊德禮宜優厚著本處巡撫都御史備綵幣羊酒親詣其家宣諭眷念

至意二十一年少保大學士毛公紀八十山東撫按以
聞詔以紀輔弼舊臣年登八十德壽並懋其賜以羊酒
撫按官及門存問仍月給食米四石歲給人夫六名應
役以示優眷二十二年大學士賈詠八十守臣以聞詔
以詠耆舊重臣年躋八袞齒德並茂其賜以羊酒命撫
按官及門存問仍月給米四石歲給人夫六名應役以
示優眷蓋毛公以八年定禮削官及夫米後官雖復而
夫米不復賈公則致仕時原無給夫米故也萬厯十年

少師大學士徐公階八十太傅居正等為請詔以階輔
佐皇祖翼戴先帝忠勤端亮茂著勞勛今年登八十足
稱榮壽准卿等奏寫勅差官存問仍賜白金五十兩大
紅紵絲蟒衣一襲綵段四表裏以示優禮耆碩至意賜
勅一異也遣使二異也賜金帛三異也賜蟒衣四異也
閣臣題請五異也不給夫米者先有故耳

賜八十九十大臣勅諭

成化七年八月以南京吏部尚書致仕魏驥年九十八

特遣行人賜勅存問其辭曰卿以醇篤之資正大之學
歷事累朝官登八座歸安田里壽屆百齡進退從容體
履康豫緬惟風采嘉歎不忘茲特遣行人齎勅存問并
賜羊酒令有司月給食米三石優贍終身卿宜倍加調
攝益隆壽祉佇聞謹論用慰渴思卿其體朕至懷萬厯
九年五月以少師太子太師吏部尚書建極殿大學士
徐階八十遣行人賜勅諭存問曰朕聞古者公孤在朝
則坐而論道更老在學則憲而乞言惟尊賢尚齒之儀

實褒德勸功之典。賸言耆碩著有勛庸。世咸仰為達尊。
朕豈靳於殊數。卿才優王佐。學擅儒宗。早馳譽於清華。
歷試功於盤錯。簡知皇祖。晉陟台司。履忠順以事一人。
持廉靖而先百辟。當僉壬之既黜。更治化以維新。懲貪
汚而仕路肅清。獎忠直而真材彙進。申明典制。多安邊
裕國之籌。默運樞機。有尊主庇民之畧。定邦本于危疑
之際。宣上德于彌留之中。翼我先皇嗣基圖而撫方夏。
保予冲子升儲貳以奉宗祧。方倚重于黃扉。遽乞間于

綠野後先多績朝廷資其典刑終始完名寰寓想其風
采自天純佑俾爾壽康屆茲八旬斂時五福匪直先民
之楷式實惟盛世之禎祥朕祇適先猷追惟舊德粵稽
功載申賜寵章茲特遣行人涂時相齎勅存問仍賜銀
五十兩大紅紵絲蟒衣一襲綵幣四表裏以示朕眷於
戲衛武雖在耄勤箴儆不忘于國晉公已解機務安危
猶係其身惟我宗工不殊前哲其茂綏蕃祉慎保修齡
尚謀黃髮之詢用慰蒼生之望欽哉

考滿非常恩賜

永樂中尚書凡三年滿有賜羊一牽酒十瓶鈔千貫者
九年滿有賜勅獎諭賜宴內殿者其後獎諭賜宴惟內
閣大臣一品九年滿有之而六年滿於羊酒鈔錠之外
又有加賜白金五十兩大紅麒麟段衣一襲及酒饌一
桌者則自張永嘉始夏貴溪嚴分宜徐華亭俱有之張
江陵九年滿於羊酒鈔錠外及銀兩表裏俱以為常賜
復加賜白金二百兩坐蟒蟒衣各一襲綵段八表裏陞

左柱國太傅子三代誥命蔭子尚寶司丞錫宴禮部辭
太傅而已最後十二年滿上為召吏禮部傳諭元輔居
正受先帝顧命夙夜在公任事任怨雖稱十二年考滿
實在閣辦事十五年忠勲與常不同應得恩蔭等項著
從厚會議來看尋遣司禮監太監張誠賜銀三百兩蟒
衣一襲紵絲四十表裏羊十隻酒六十瓶鈔十萬貫酒
飯五桌雞十隻鵝五隻猪肉一百五十斤湯五品白麵
一百二十斤香油三百二十斤白糖一百斤黑糖一百

四十斤蜜二十五斤燭一百對柴三百扛蓮肉二十斤
荔枝十斤圓眼十斤膠棗紅棗各二十斤栗子三十斤
冬筍二十斤蔴菇香菌花椒胡椒各五斤尋勅諭元輔
卿親受先帝遺囑輔朕十年四海昇平四夷賓服實賴
卿匡弼之功精忠大勲朕言不能述官不能酬茲歷十
五年考績特於常典之外賜銀二百兩坐蟒蟒衣各一
襲歲加祿米二百石薄示褒眷先生其欽承之該吏禮
二部疏上加上柱國太傅支伯爵俸蔭子尚寶司丞給

四代誥命仍賜勅獎諭錫宴禮部疏辭上柱國伯爵俸而已

勛臣致仕恩典

凡勛戚不任事即食祿奉朝請或以病免朝參未有致仕者正德中張英公懋乞骸特賜勅獎諭賜金幣輿卒二十人免朝給祿視輔臣恩禮有加可謂纓弁之極榮矣初朱成公希忠辭府事獎賜亦如之而加輿卒為三十人仍舊知經筵及監修國史

中貴亦無致仕嘉靖中司禮監太監蕭敬張佐就閒
敬賜歲夫十名佐夫五名月廩俱十石萬曆十三年
司禮監太監張宏以病乞閒賜月廩二十石歲夫三
十名尤重然命下之次日而卒

八十恩數

嘉靖三十八年正月少師大學士嚴嵩八十同官徐階
等上聞詔苑直出入得乘肩輿歲支伯爵祿賜白金百
兩綵幣八表裏寶鈔羊酒錫宴禮部其年六月諭禮部

東一真人恭誠伯陶仲文職掌玄教屢盡忠誠在告年
踰八十其降勅遣錦衣衛千戶一人往存問賜白金一
百兩綵幣四表裏寶鈔羊酒以示眷懷按二臣所邁殊
為隆渥特以名德不昌終從削奪故不足道也

嚴辭伯爵祿不許聽辭舊支正一品尚書二俸按伯
爵祿千二百石今定本色八百石每石折銀七錢折
鈔四百石正一品俸千七十石尚書俸七百三十四
石則當為千八百四石矣是反奪其俸六百石也豈

一二品俱止二分本色以是為厚薄耶或前二俸不
住支也

丁憂恩典

洪武中布政使魏鑑臧哲徐中知府李亨丁憂家居俱
念其居官勤慎各賜勅獎諭鑑哲賜米六十石鈔二十
五錠中亨米五十石鈔二十錠仍令其恪恭以孝服滿
來朝分理庶務為生民福永樂末戶部尚書夏原吉自
繫所赦復職以母喪乞歸守制仁廟慰諭之謂卿有喪

服我無喪服乎遂留贊輔賜米十石鈔一萬錠胡椒一百斤遣家屬護喪歸兵部給驛舟有司治葬又楊庶子榮丁父憂奔喪賜鈔千貫葬畢復任丁母憂以邊事留明年始奔喪復賜鈔千貫奉御宋成護行葬畢復任成化二年李少保賢丁父憂賜賻如例奔喪賜素食品備途中用太監林興輔行十六年劉閣學吉丁父憂賜四表裏銀五十兩米十石錠十塊羊四羖酒十瓶差少監送至其家正德十年楊少師廷和奔喪行人呂律護送

賜勅書給驛禮部郎中祝鑾諭祭工部郎中王孝忠治喪既抵家遣司禮監少監秦用催取萬厯五年張少師居正聞父喪上及兩宮賜白金共一千五百兩鈔三萬貫綵幣三十表裏白米六十石麻布百五十疋香油柴炭稱是留輔政辭不許遣司禮監太監同子編修嗣修代治喪禮部主事曹誥等官司祭葬請辭常祿許之仍日給酒飯月給白米十石香油二百斤燭二百枝茶三十斤鹽一百斤柴炭稱是大婚後許奔喪上及慈聖各

賜白金五百兩綵幣八表裏仁聖白金三百兩綵幣六
表裏瀕行賜白金八寶六十兩尚寶少卿鄭欽錦衣指
揮史繼書護送往回馳驛撫按官以起程日期星夜馳
奏既葬復命錦衣指揮翟汝義敦召之限十日抵其地
朝辭賜白金綵幣酒饌以重其行服除賜白玉帶一條
大紅坐蟒蟒衣各一襲金執壺一把金臺盞一副慈慶
賜白金五十兩紵絲四表裏慈寧賜膳九品金執壺一
把金臺盞一副金鑲牙筋一雙白金五十兩綵段四表

裏葷素食八盒甜食四盒酒十瓶仍設宴管待

十一年張少師四維聞父喪守制賜齋米八十一包布十五筒鈔三千五百貫銀三百兩綵幣六表裏兩宮賜銀二百兩綵幣四表裏陞辭賜白金一百兩綵幣六表裏行人護行按蒲州賜比江陵僅三之一視他輔臣則倍蓰矣嘉靖末呂少傅本丁母憂無所賜

大臣歿後儀典

洪武二年六月故征北左副將軍中書平章軍國重事

鄂國公常遇春卒於軍計聞上命禮部議舉哀喪至龍
江上親出祭之勅葬鍾山之陰給明器九十事納之墓
贈開平王諡忠武仍王其三代後中山武寧王卒禮如
遇春蓋以二王為開國諸功臣冠故也自後內閣首輔
卒於任者如贈太師楊士奇楊溥李賢彭時贈太保費
宏太傅李時恩禮最號隆重然祭不過九壇齋糧麻布
五十石足而已萬厯十年六月故太師吏部尚書中極
殿大學士張居正卒於位上賜齋壇麻布五十筒筒十

正米二百石香燭油薪稱是又與仁聖慈聖兩宮潞王共賻白金二千三百兩兩宮復賜齋糧米麻布二百疋香燭油薪有差祭九壇外加七壇大約視親王及國公之加師傅者贈上柱國諡文忠遣官會布政司營葬仍命京堂四品官錦衣堂上官各一員護喪其子疏辭謝上批答朕念先生承先帝顧命鞠躬盡瘁歿而後已忠勞可憫他還有高年之母在京著差司禮監太監陳政護送還鄉馳驛前去然未幾奪其官并追一切恩典

居守賜勅

國朝六飛在狩必有居守如文皇幸北京皇太子監國
尚書蹇義金忠諭德楊士奇輔又北征皇太孫居守尚
書夏原吉輔宣德征漢庶人鄭王襄王居守廣平侯袁
容武安侯鄭亨都督山雲張昇尚書黃淮黃福李友直
輔正統己巳上北征邸王居守駙馬都尉尚書王直胡
濙內閣學士陳循高穀輔此皆重在居守諸臣無專勅
正德上南征寧庶人是時無監國者內則司禮監太監

蕭敬等大學士楊廷和毛紀外則五府會昌侯孫銘等
六部尚書陸完等廠衛太監張銳等團營太監谷大用
兵部尚書王瓊等皆有勅是時權在中人故敕中人重
而內閣輕嘉靖上幸承天皇帝太子監國宣城伯衛鐸遂
安伯陳鏊留守大學士顧鼎臣尚書張瓚同留守是時
上注意內閣故顧有特勅為重而諸大臣輕今按正德內
閣勅可攷者皇帝勅諭大學士楊廷和等朕今親統
六師奉行天討剿除叛逆以安宗社尚念根本重大居

守無人一應合行事務恐致廢弛特命爾等照依內閣舊規同寅協恭勤慎供事每日司禮監發下在京在外各衙門題奏本俱要一一用心看詳擬旨封進奏請施行其奏有軍機緊急重大事情合用軍馬錢糧器械關防符驗之類尤要詳加審處擬旨封進聽司禮監一面奏聞定奪一面發各衙門依擬議處毋致遲滯誤事爾等受茲重托尤須盡心竭力維持公道不許徇私執拗如違責有所歸爾等其欽承之皇帝勅諭少保太子太

傳禮部尚書武英殿大學士顧鼎臣朕茲巡幸承天府
恭視顯陵車駕往回動歷數月昨已冊立東宮命之監
國特留卿贊輔協同文武重臣居守內自禁掖外而都
城遠及邊郵并大小百司庶務悉以付卿卿宜遵承朕
命應啟請者擬請令旨施行應聞奏者馳奏行在定奪
其有密切緊重事情宜用欽賜印記來聞卿講幄重臣
久懷經濟朕茲重寄宜欽承之

在京尚書都御史特勅

故事臣僚奉特旨者有勅若部院大臣拜命履任而已
獨宣德中於兵部尚書許廓有勅謂前尚書張本能體
朕心上汲汲於國事下惓惓於兵民專意畢慮夙夜不
懈剋弊舉廢各有條理其卒也朕念之不忘眷求賢能
以繼其任爾廓久任於朝諳練政務特陞兵部尚書膺
茲重寄惟秉忠瀝誠勤以莅事廉以率下審察必明謀
慮必固如政有不通弊有當革利有當建者毋憚面陳
朕將擇而行之毋怠毋忽又勅都察院右都御史顧佐

謂爾佐剛直廉正簡在朕心今特畀茲任其竭誠盡力
必公必明恪恭夙夜毋憚勤勞彈劾愆謬毋避權要毋
枉良善毋縱奸宄其各道見任御史宜審擇之凡廉謹
公正老成醇厚者俱留在職其不達政體不諳文移貪
淫無恥及犯贓罪者悉送吏部降黜公差給假丁憂者
亦如之務盡至公之道所闕御史即行吏部慎選自今
不許濫授爾其欽哉正德勅左都御史劉宇等令其持
廉秉公正已率屬各道御史務令奉職守法清白自律

夙夜匪懈一應政務悉依諸司職掌及憲綱施行言事
必存大體治事必循舊章凡有章奏必先呈稟爾等指
實奏聞黜幽陟明舊典具在仍行南京都察院一體施
行嘉靖敕兵部左侍郎兼學士署掌都察院張璁謂御
史論事不知大體責人不究虛實望風捕影往往失真
一倡衆和期於必勝巡按在外又不能正己律下惟知
以聲勢加人激揚官屬則以喜怒為取舍鞫問刑獄則
任已情為出入如山西馬錄惑於朋言欲陷一家無罪

之人於死地勘官轉相附會釀成大獄一省如此他處可知爾張璉宜宣揚朕意昭示各官痛自懲創勉圖修省事君以不欺為主律下以正己為先論事必明大體而抑細故論人必伸君子而抑小人鞠獄惟平惟允勿憚五過之疵當官惟慎惟勤勿忘三事之訓勿矯抗以要名勿偏私以玩法庶幾不愧風紀之任不忝耳目之官仍行南京都察院一體施行後列款凡五條

洪熙特旌大臣三勅

勅太子少傅兼謹身殿大學士楊榮茲為朔漠梗化久
犯邊疆我皇考太宗文皇帝為宗社子孫天下臣民長
久之計不得已躬擐甲胄親率六師往行天討豈期朔
寇畏威遠遁班師之際不幸皇考上賓六軍在外朕又
遠違膝下及斯崩殂兒孫亦莫能知惟卿盡忠為國報
先皇帝恩德獨為果斷致有今日家國寧謐宗社奠安
今辰奏告忽思至此實感不已卿當重賚曩者哀悼倉
皇之際報卿甚微今追前勛加賜白金五十兩綵幣表

裏各十寶鈔二萬貫白米二十石特陞卿為工部尚書
前官如故三俸俱支全支尚書本色卿當領受以慰朕
懷又勅少師兼吏部尚書蹇義曩朕監國之時卿以先
朝舊臣擢兼詹事日侍左右時肇建兩京政務方殷隨
事籌畫適中惟艱卿以善翊君以義徇國勞心焦思不
遑身家載歷艱虞未嘗有咨嗟之意及朕嗣承大統贊
襄治理用濟斯民喻朕於道不懈益恭二十餘年夷險
一節朕篤不忘茲以已意創製蹇忠貞印一枚賜卿用

藏於家傳之後世俾爾子孫知前人顯榮於國者良不易致宜加保守朕之子孫亦知卿弼予於艱體朕愛卿之心以保爾子孫庶幾上下相安與國咸休書曰惟后非賢不乂惟賢非后不食自古君臣相遇難矣往績惟茂永終是圖欽哉又勅少傅兵部尚書兼華蓋殿大學士楊士奇往者國家肇建兩京政務方殷朕膺監國之命卿以翰林親臣兼職春坊留侍左右贊助庶務敷答章奏籌畫之際適中惟艱朕恒以為慮尚賴卿一二臣

僚合心同德徇國忘身屢歷艱虞曾不易志及朕嗣位
以來嘉謀嘉猷入告於內期予於治以憂黎元正固無
二簡在朕心茲以己意創製楊貞一印一枚賜卿用藏
於家傳之後世庶卿子孫由是知卿克致顯榮不易惟
艱思保守之惟朕子孫亦由是知卿弼朕之功以保全
爾子孫與國咸休與世無斁詩曰無言不酬無德不報
又曰靡不有初鮮克有終尚克交修以成明良之譽欽
哉按此皆洪熙元年所賜者前一勅報榆木功後二勅

報監國功其精切懇至當非後世可擬故特志之

太后還宮賜勅

今上將大婚慈聖太后還慈寧宮特以上付托少師張居正仍賜坐蟒蟒衣各一襲綵段八表裏白金二百兩其勅辭云皇帝大婚禮在邇我當還本宮不得如前時常常守著看管恐皇帝不似前向學勤政有累聖德為此深慮先生親受先帝付托有師保之責比別不同今特申諭交與先生務要朝夕納誨以輔其德用終先帝

付托重義庶社稷蒼生永有賴焉先生其敬承之故諭
外賜坐蟒蟒衣各一襲綵段八表裏銀二百兩示惓惓
懇切至意

賜勅獎言事

高廟以右司諫石時中左判錄夏守中言事各賜鈔十
錠巡按陝西御史凌漢言事賜其子鈔二百錠綺衣一
襲

文廟以鎮守湖廣總兵官鎮遠侯顧成言事賜鈔五千

貫文綺帛八疋綵絹八疋再以言事賜鈔一萬貫銀二百兩綺絹如前又以軍人張貞言事賜鈔千貫帛衣一襲

仁廟以大學士楊士奇言事賜白米十石綵幣二表裏鈔二千貫又以學士楊溥言事賜綵幣一雙鈔千貫二公及鎮遠皆有勅獎諭

若洪武中超擢典史馮堅衛經歷黃福邊彝又擢祁門知縣何敏中為徽州知府則皆以小臣言事者也

嘉靖中刑科都給事中高時効翊國公勛加俸一級
御史鄒應龍劾少師嵩陞通政司右叅議右中允趙
貞吉以論兵陞右諭德

手勅問大臣疾

洪武十八年太傅魏國公徐達瘡愈帝賜勅曰方今九
夷八蠻大者畏力小者懷德非將軍忠誠耿耿以勞為
逸何由臻茲將軍功昭上下澤及兵農而於人欲之私
秋毫無犯此其明智者乎邇者將軍有瘡疾朕初聞之

於心恐焉今喜疾愈特遣將軍子持勅致意將軍少
安毋勞正統七年少師兵部尚書華蓋殿大學士楊士
竒有疾又以子稷犯法在告帝賜勅曰卿歷事祖宗以
及朕躬啟沃弼贊勞勩實多比卿以疾違朕者數月朕
心拳拳惟卿子乖家訓干國紀朕不敢私卿其以理自
處勉進藥食早圖康復以副注望景泰六年少保太子
太傅兵部尚書于謙有疾帝賜勅曰昨聞卿偶膺重疾
朕心惕然念卿夙膺重托旦夕不可或無已令近臣攜

醫往視茲復賜卿白金五十兩為湯藥費并賜羊酒白
米卿其勉扶疾體副朕惓惓之意嘉靖十三年少師太
子太師吏部尚書華蓋殿大學士張孚敬有疾上手札
諭昨少保時特為卿陳病苦之情朕惟近古之君有剪
鬚療其臣之疾者今朕每自取數味合以飲或時亦效
茲手揀數味清心寧神驅火保肺之藥為一服卿亦如
常煎而服之服時用蜜一大茶匙倘得病減庶慰朕念
雖非剪鬚者之切亦見朕意服後一二日可告朕何如

四十四年少師太子太師吏部尚書建極殿大學士徐階有疾上遣御醫徐偉視疾中涓賜猪羊甜醬瓜茄酒米如例已復出尚方珍劑二甌命司禮貴臣王本齋手扎諭公痰火一疾惟須自慎既不可用寒劑又不宜太降火又有謂痰隨氣降此非治法也但仍以涼平性品用之便消順耳又青州白丸子真者亦效非其本地合者無益至於牽扯背肩痛當以祛風順氣之劑間服之亦少資云萬厯十年諭太師張太獄朕自冲齡登極賴

先生啟沃佐理心無所不盡迄今十載四海昇平朕垂拱受成先生真足以光先帝顧命朕方切永賴先生屢次辭忍離朕耶朕知先生竭力國事致此勞瘁然不妨在京調理閣務且總大綱著次輔協理先生專養精神省思慮自然康復慰朕朝夕惓惓至意按大臣有疾賜米及羊猪醬瓜茹遣醫診視此恒典也徐楊于三公獲勅諭已為優禮而永嘉華亭獨拜手和之藥辭旨睠睠踰於骨肉江陵至以三公署別號稱先生真殊典哉特

非上意耳

行人勅免真人朝

嘉靖十七年皇帝勅諭正一嗣教大真人張彥頤朕惟我皇祖之制天下大小衙門官員凡三歲一朝覲卿亦在與焉重其教也今年又當其期朕念卿晚年方得一子矧在襁褓或難遠離特遣行人黃如桂往諭今次特暫免卿一來俾卿得專守視見朕保重爾嗣之意卿其欽承之哉故諭按免朝傳奉一旨足矣今至厓勅諭遣

行人稱卿而恤其子幼即勲戚宰輔所不能及也亦異矣

勅獎郡邑下僚

洪武中勞緣事丹徒知縣胡孟通縣丞郭伯高廣德州知州楊翰金壇縣丞李思進俱留復任為耆老奏保也勞建陽知縣郭伯大縣丞陸鎰伯大陞泉州府同知鎰福州通判勞盱眙知縣方素易陞金華府知府以政績也勞常熟知縣成莧奇以執府悍吏也勞崇德知縣畢

輝縣丞齊搏以治奸頑也勞蘇州府知府王觀以捶死
奸吏也勞平陽知縣張礎以具奏金鄉衛官也已上俱
遣行人勞蠹興主簿王復春仍陞常州府同知已上遣
吏科庶吉士楊靖皆有勅諭上尊之賜礎加鈔三十錠
素易有鈔錠幣帛勞景東府知府俄陶以不從亂也有
勅諭仍賜白金五百兩文綺二十疋永樂中賜勅獎汶
上知縣史誠上賜織金紗衣一襲鈔千貫仍陞濟寧知
州掌縣事以縣事治也昌樂縣丞于子仁以緣事奏保

賜金幣陞知縣後復以緣事奏保賜金幣陞知府尤為異常

賜勅褒致仕官

高皇帝勅諭秦府致仕左長史文原吉謂其昔在秦府終其任而國賴以安民樂田里一旦致政而歸國凶而民擾所以然者由羣小僉邪導其為非於是忠良奸宄昭然可見使朕念卿夙夜不忘特遣中使賫白金二錠楮幣百錠文綺帛三十疋賜卿以養高年至可領之原

吉初以治書侍御史執政遷秦左相秩正二品後罷相以左長史行相事秩五品而致仕後恩禮同宰輔大臣固不以品秩高下為軒輊也

賜夫人勅

洪武二十一年賜信國公湯和夫人胡氏黃金二百兩白金一千兩鈔五百錠綵段三十表裏仍賜勅曰婦之道專內政而無妒勤勞啟家夫婦同心若此古有之今之人少見惟朕臣湯和與爾夫人同朕鄉里當天下大

亂之時人各挈家避難皈依豪雄所在如之獨爾信國
立勛業於大廷今也功成名遂攜長幼而歸故鄉嗚呼
昔爾夫婦墨髮而來今歸故鄉皆蒼顏皓首夫人淑德
命婦如之鮮矣特賜助和之功啟家之勞如數夫人領
之永樂八年遣行人余昊勅涼州都督吳允誠妻曰比
邊人以兵脅爾夫妻為叛爾夫及子從朕征討而爾能
守節勵志與子管者謀執叛者戮之以婦人而秉丈夫
之節忠以報國智以脫患朕甚嘉焉今賜爾綵幣十表

裏米百石鈔四千貫羊百羖用示褒嘉

弇山堂別集卷十三